



Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/10-00457 pillugu sisamangornermi ulloq 28. januar 2010-mi aalajangiinera pillugu Naalakkersuisunut ilisimatitsineq

AI-mi konto 89.71.40-mi aningaasaliissutinik atugassanngortitsinissaq aamma Ilulissani erngup nukinganik innaallagissiorfissamut akuersissut

Naalakkersuisut **inassutigaa**,

Nukissiorfiit Namminersorlutik Oqartussat sinnerlugit kontomi pingaarnermi 89.71.40-mi aningaasaqarnikkut killissarititaasut iluanni Ilulissani erngup nukinganik innaallagissiorfiup sananeqarnissaa pillugu Pihl & Søniumut isumaqatigiissusiornissamut piginnaatinneqassasut.

Aningaasaqarnermut Ataatsimiititaliap oqaaseqaatai

2010-mi aningaasanut inatsimmi kontomi pingaarnermi 89.71.40-mi *Nukissiorfinni sanaartornermut taarsigassarsiarititanut* tunngasumi suliaq nr. 120.15.003-mut, Ilulissani erngup nukinganik innaallagissiorfimmut tunngasumi suliassamut 658 mio. kr.-it immikkoortinneqarput.

Suliassaq suliariumannittussarsiuunneqarpoq aammalu tamanna tunngavigalugu sananeqarnissaanut suliffeqarfiup Pihl & Søn-ip isumaqatigiissuteqarfiginissaa Naalakkersuisut kissaatigaa.

Aningaasartuutit siumut naatsorsuutigineqareersinnaanngitsut ilanngullugit suliassamut tamarmiusumut aningaasat atorneqartussat 652 mio. kr.-iusut Aningaasaqarnermut Ataatsimiititaliap paasivaa. Suliassamut 658 mio. kr.-it immikkoortinneqarmata 6 mio. kr.-it sinneruttut suliassami kontomut pingaarnermut naleqquttumut, assersuutugalugu kontomut pingaarnermut 80.00.01-imut, Nuussinissanut sillimmatinut tunngasumut nuunneqassapput. Tamanna pillugu Naalakkersuisut qinnuteqaammik piaartumik nassiussaqaarnissaat naatsorsuutigineqarpoq.

Pinngortitamut avatangiisunullu tunngasuni oqartussaasunit akuersissutinik arlalinnik pissarsiniarnissat suli amigaatigineqartut Aningaasaqarnermut Ataatsimiititaliamit maluginiarneqarpoq. Isummernissamut tunngavissiap Aningaasaqarnermut Ataatsimiititaliamut *nassiutinnginnerani* akuersissutit taakku suli pissarsiarineqarsimanngimmata naapertuutinngitsoq ataatsimiititaliaq isumaqarpoq. Taamaalilluni akuersissutit pigineqanngitsut kingunerisaanik suliassaq ilaatigut

akisunerulersinnaavoq ilaatigullu taama periuseqarneq pinngortitamik avatangiisinillu eriaginninnissamut inatsisitigut pisussaaffimmik aqutsinikkut isumaginninnissamik ataqqinninninnertut isigineqarsinnaalluni. Minnerunngitsumik annertuumik aningaasaliinissaq eqqarsaatigalugu tamakkiisumik toqqissisimanartumik suliarillugaasumillu tunngaveqarlutik oqartussaasut suliarinnittariaqarput. Taamaalilluni suliaq taama pingaaruteqartigisoq nukingiullugu suliarineqartariaqanngilaq.

Isummernissamut tunngavissiami allassimavoq erngup nukinganik innaallagissiorfiup aningaasalersorneqarnissaa ilaatigut konto pingaarneq 89.71.40 atorlugu Nunatta Karsianit Nukissiorfinnut sanaartornermut pisarnertut taarsigassarsisitsineq aqutugalugu pissasoq **imaluunniit** periuseq BOT (Build-Operate-Transfer) atorneqassasoq, tamatumani suleqatigisaq avataaneersoq piffissap ilaani erngup nukinganik innaallagissiorfimmik sanassalluni ingerlatsissallunilu, tamatumalu kingorna taanna Namminersorlutik Oqartussanut tunniunneqassalluni. Periutsip taassuma atorneratigut suleqatigisap avataaneersup piffissami sivisunerusumi isumaqatigiissutigineqartumi Nukissiorfinnut innaallagissamik tunisinermigut aningaasaliissutini matussusissavai. Aningaasalersuinissamut periutsit taaneqartut attuumassuteqarnerat isummernissamut tunngavissiami qulaajarneqanngitsoq Aningaasaqarnermut Ataatsimiititaliap paasivaa. Tamanna naapertuuppallaanngilaq. Kontomili pingaarnermi siuliani taaneqartumi Ilulissani erngup nukinganik innaallagissiorfimmut aningaasanik immikkoortitsisoqarnera ataatsimiititaliamit aallaavigineqartariaqarpoq, taamaattumillu soorlu Nukissiorfiit sanaartornermik ingerlataanni allani taamaatut ingerlatsisoqartartoq Ilulissani erngup nukinganik innaallagissiorfik nunatta karsianit sanaartornermut taarsigassarsiaritit ataqutugalugit aningaasalersorneqassasoq ataatsimiititaliap tunngavissaatippaa. Naalakkersuisut aningaasalersuinissamut periutsinik allanik isumaliuteqarnerat ataatsimiititaliamit soorunami ajorineqanngilaq, taamaattorli ataatsimiititaliaq isumaqarpoq qinnuteqaatip matumani pineqartup nassiunneqannginnerani apeqqut tamanna *aamma* qulaajarneqarsimassagaluartoq. Apeqqut tamanna pillugu Naalakkersuisut isumaliutiginneqqinnerat aalajangiinerilu pillugit ataatsimiititaliap ingerlaannartumik ilisimatinneqartarnissani naatsorsuutigaa.

Tamatuma saniatigut imermik imigassamik pisuussutit akornanni killiliussat iluini ingerlatat pillugit avatangiisit pillugit peqqussummi aalajangersakkanik avaqqutsinissaq, ulloq 22. januar 2010 killiliullugu tusarniaassutigineqartutut oqaatigineqartoq eqqarsaatigalugu akerliusoqarsimanersoq pillugu Naalakkersuisut namminneq *paasissutissiisimasariaqaraluarput* – taamaalilluni qinnuteqaatip ulloq 26. januar 2010-mi Aningaasaqarnermut Ataatsimiititaliamut *nassiutinnginnerani* tusarniaanermi piffissaliussaq naareersimavoq.

Nukissiorfinnit ilanngussaq 10. december 2009-meersoq Naalakkersuisut qinnuteqaamminnut ilannguppaat. Erngup nukinganik innaallagissiorfimmut atatillugu suliap ingerlariaqqinnissaanut piginnaatitsissumik kingusinnerpaamik ulloq 23. december 2009-mi tunniussisoqarnissaa piffissap taamaannerani Nukissiorfiit kissaatigigaat ilanngussami tassani allassimavoq. Avatangiisinut tunngasuni aalajangiinissamut tunngavissamik naammassisamik suliarilluakkamillu pisariaqartitsineq pillugu siuliani oqaatigineqartunut atatillugu aalajangiinissap matumani pineqartutut annertutigisup naalakkersuinermik suliaqartunit nukingiunneqannginnissaata pingaaruteqarnera Aningaasaqarnermut Ataatsimiititaliamit matumanissaaq oqaatigineqassaaq. Taamaalilluni naalakkersuisoqarfimmi Nukissiorfinnilu allaffissornikkut suliamik piareersaasut naalakkersuinermik suliaqartut piffissaqarluartinneqarnissaat eqqumaffiginerusariaqarpaat.

Suliassamut aningaasaliissutit ukiumut agguataarneqarnerannik Nukissiorfiit kissateqartut ilanngussami aamma tassani allassimavoq. Ukiumut agguataarineq taanna aningaasanut inatsimmi ukiunik agguataarinermit *naapertuussorinangilaq*. Taamaattumik Aningaasaqarnermut Ataatsimiititaliap Naalakkersuisunut eqqaasitsissutigeqqissavaa Nunatta Karsiata sanaartornermut aningaasaliissutissai **piviusorsiortunik tunngaveqarluni** missingersuusiorneqassasut. Sanaartornermut aningaasat atorineqartussaanningsut siuliani aallarniutigalugu taaneqartut naapertorlugit suliassamit piaartumik peerneqarpata apeqqut tamanna ilanngunneqassasoq Aningaasaqarnermut Ataatsimiititaliamit naatsorsuutigineqarpoq.

Aningaasaqarnermut Ataatsimiititaliap aalajangiinera

Naalakkersuisunit inassuteqaatit Aningaasaqarnermut Ataatsimiititaliamit **akuerineqarput**.

Aningaasaqarnermut Ataatsimiititaliaq sinnerlugu

Niels Thomsen

Aningaasaqarnermut Ataatsimiititaliap siulittaasuata tullia